

分類四部稿卷之一百五十六

吳郡王世貞元美著

說部

宛委餘編一

余故有藝苑卮言六卷其第六卷不忍而會坐亡所
揚抑表著第獵取書史中浮語稍足考證甚或雜而
亡裨於文字者念棄之爲其敝帚不忍而會坐上重
浮繫招提中無他書足攜間於二藏遺編小有所泐
瀾或時繹腹笥之遺合之別成四卷晉游以後復日
有所筆因更益之爲十卷最後里居復得六卷名之

曰宛委餘編宛委黃帝所藏書處也嗚呼孔子之教
門人曰小子何莫學夫詩而又繼之曰多識於鳥獸
草木之名夫學詩而旁取夫鳥獸草木之名爲貴則
夫以鳥獸草木之名而傳詩者十寧無一二益哉卽
薦紳先生抗手而談性命曰吾一以貫之亦何有乎
不佞嗟夫嗟夫余過矣余乃淫於其末矣世貞敘
朱鷺魚以鳥魚也鳥也俱鷺之儀貌也鳥轉爲鴉鴉
轉爲雅食茄下茄荷也當作荷莖黃姑卽河鼓也轉
聲爲黃姑古人以牽牛爲河鼓今星曆家牽牛河鼓
各一星

晨風海月名甚古雅晨風鷗也海月似水母而非大
如鏡白色正圓其柱如搔頭味佳王勃落霞與孤鶩
齊飛宋人謂落霞卽飛蛾也意者飛蛾有此名若勃
賦作飛蛾對孤鶩是何境界

今世總稱履曰鞋或稱履鞋按古方言云謂之不借
朝鮮洲水之上謂之邛角南方江淮之間總謂之麤
梁徐土邵沂之間謂之邛角或心徒或爲席下凡反或
爲綱或爲縷其不同如此

不借爲草履不落爲酒杯不托爲飮飮不律爲筆又
名聿又名弗軍持爲淨瓶繞梁爲樂器杖名扶老烏

亦名扶老蟲名寄生軍裝亦名寄生鸛名晨風馬亦
名晨風木名長卿螭越亦字長卿草曰屠蘇屋曰屠
蘇冠幘曰屠蘇酒亦曰屠蘇藁砧爲夫石闕爲碑鄉
語也琵琶有大小忽雷馬有忽雷駁鱣魚亦名忽雷
○趙后名飛燕張平有狗亦名飛燕又紅陽飛燕馬
也仙人名王母函山鳥亦名王母句踐名越王海味
似蟻者亦名越王梁王名彭越海中小蟹亦名彭越
相馬人名博勞鳥亦名博勞音也見樂府及謠仲由
字子路熊亦名子路見續博物志

將離贈芍藥芍藥亦名可離相招贈文無文無一名

常歸欲忘人之憂贈丹棘丹棘一名忘憂欲竭人之

然贈青裳青裳一名合歡後人折柳贈行折梅寄遠

見古今註又屈軼指佞見論衡帝休不愁見山海經芍藥養

性見博物志臯蘇釋忿見王粲書甘棗不惑見東晉發蒙記樹有長生

見鄴中記木有無患實可去垢見纂異文

果有隱夫木有女貞又有平仲君遷藥有長卿簡子

樹有長生萬年靈壽君子女貞端正皆美名也賓連

闊達平露紫脫華平恒春皆祥名也

有麪樹則南中桄榔也酒樹則椰也肉樹則端溪豬

肉子也大如杯炙而食之味如豬肉而美椰似酒耳

甘而薄亦不堪飲若頻遜國樹葉汁取停之數日卽
爲佳酒拘樓國僊漿取之樹腹中又青田核以水寘
之少頃成酒乃真酒樹也有酒山南昌國僊山泉也
有酒泉涼州地水也○枳椇子美如飴能令酒味薄
若以其木爲屋柱一屋之酒皆薄

相思子有蔓生者與龍腦樹宜能令香不耗搜神記
云韓朋墓木也霍小玉傳有之

蘋婆當作頻婆與末利初不曉其何解後覽翻譯名
義云頻婆此云相思也末利此云柰花也蓋皆梵音
爾栴檀本香名而釋曰離垢今之檀香更因之

又頻婆今共土所珍而古不經見唯楞嚴諸經有之
或云元時通中國始盛耳按洽聞記稱唐末徽中魏
郡人王方言嘗於河中灘上拾得一小樹栽之及長
乃林檎也實大如小黃欬色白如玉間以硃點味非
常美進高宗種於苑中以爲朱柰又名五色林檎或
謂之聯珠果上賜王方言階文林郎又謂之文林果
俗云蘋婆果按此乃真頻婆果耳唐志云林檎似赤
柰子一名黑檎亦名朱檎今蘋果止產北地淮以南
絕無之廣固有林檎豈得有頻婆果邪
夜合花開香滿庭今人以百合爲夜合似非也按夜

合本似梧桐枝弱葉繁互相交結一曰合昏一曰青
蒙卽合歡也嵇康種之舍前今百合花亦明開夜合
但草本其香殊甚

盧橘夏熟註旣誤楊用脩據吳錄地理志云朱光祿
爲建安郡中庭有橘冬月覆上樹裹之至明年春夏
色變青黑味尤絕美謂此卽盧橘然非上林所種也
按魏王花木志曰盧橘蜀土有給客橙似橘而非若
柚而香冬夏華實相繼或如彈丸或如拳通歲食之
亦名盧橘蜀土移栽上林固易耳

右軍帖有日給子不知何物雅杜恕篤論曰日給之

華與柰相似也柰結實而日給零落又似不生實者
○盧循餉宋武益智粽又餉遠公按顧微廣州記曰
益智葉如襄荷莖如竹箭子從心中出一枝有十子
子內白骨四破去之取外度蜜煮爲粽子味辛

自太史氏謂司馬長卿所載草木鳥獸多過其實後
人相沿疑之以盧橘夏熟答還雜支等語皆爲增飾
按西京雜記載梨有六谷細葉縹葉金葉瀚海東王
紫條紫李青李芳李各十種棗有弱枝玉門青華赤
心西王棠棣棗七種栗有候榛瑰嶧陽四種桃有
湘核金城綺葉紫文秦桃桴桃霜桃胡桃櫻桃含桃

十種李有青綺青房同心車下含枝金枝顏淵紫李
綠李朱李黃李羌李燕李蠻李侯李十五種柰有白
紫綠三種檀有蠻羌猴三種梓有青烏赤葉三種棠
有赤白青沙四種梅有紫葉紫葉同心麗枝朱梅燕
梅猴梅七種杏有蓬萊文杏二種桐有椅桐梧桐荆
桐三種林檎十枇杷十橙十安石榴十檉十白銀樹
十黃銀樹十槐六百四十年長生樹十萬年長生
樹十扶老木十守宮槐十金明樹二十搖風樹十鳴
風樹十琉璃樹七池離樹十離婁樹十白俞掬桂蜀
漆樹各十栴四欒七栝十楔四楓四後云從上林令

虞淵得羣臣所上草木名二千餘種後失其本此其
記憶者又茂陵富人袁廣漢園有白鸚鵡紫鴛鴦牝
牛青兕奇獸恠禽江鷗海鶴悉沒入上林太液池中
有鳴鶴舟容與舟清曠舟採菱舟越女舟池有洲黏
桓一株大六十圍五柞宮五柞樹蔭覆數十畝三輔
黃圖高帝時南粵王獻龍眼樹武帝於交趾移荔枝
百株植上林建扶荔宮中有菖蒲百本山薑十本甘
蕉十二本留求子十本桂百本蜜香指甲花百本龍
眼檳榔橄欖千歲子柑橘皆百餘本內荔枝一株獨
茂忽夕萎死守吏死者百餘夫草木多至二千餘種

則長卿所言固未虛也窮措六不復知前代帝王富
盛便不復信可發一笑

亢倉子曰得時之禾長稠而大穗圓粟而薄糠米粒
而香舂而易白食之強失時之禾深芒而小莖穗銳
多粃而青蠶得時之黍穗不芒以長搏米而寡糠失
時之黍大本華莖葉膏短穗得時之稻莖葆長稠穗
如馬尾失時之稻纖莖而不滋厚糠而苗死得時之
麻疎節而色陽堅泉而小本失時之麻蕃柯短莖岸
節而葉虫得時之菽長莖而短長其莢二七以爲族
多枝數節競葉繁實稱之重食之息失時之菽心長

而蔓浮葉虛本疎節而小莢得時之麥長桐而頸族
二七以爲行薄翼而醇色食之使人肥且有力失時
之麥附腫多病弱苗而莢穗此是農經第一語也得
時失時之說物亦有然者矣

羣土之長是爲五粟其次爲五沃又次爲五位又次
爲五蔭又次爲五壤又次爲浮凡上土三十物種十
二物中土曰五志其次曰五蘊又次曰五壑又次曰
五剽又次曰五沙又次曰五塌凡中土三十物種十
二物下土曰五猶其次曰五弘又次曰五殖又次曰
五穀又次曰五鳧又次曰五桀凡下土三十物種十

二物蓋因地以爲種所以無遺利也

儒者言王者之世有蓬脯蓂莢屈軼𧇧𧇧蓬脯者厨
中自生肉脯薄如蓬形𧇧鼓生風寒涼食物使之不
臞事極可笑蓂莢夾階而生月朔日一莢生至十五
日而足十六日一莢落至晦而盡王者不必按曆而
知朔宋之問所謂節晦蓂全落是也屈軼卽所謂指
佞草也𧇧𧇧者一角之羊也皋陶治獄其罪疑者令
觸之有罪則觸無罪則不觸卽今所畫獬廌也又有
倉兕水獸也一身九頭善覆舟師尚父渡孟津以號
其衆令速涉王充皆有辨

五芝有石芝有木芝有草芝有肉芝有菌芝石芝亦
者如珊瑚白者如肪黑者如漆青如翠羽黃如紫金
皆光明洞徹晦夜能照又有玉脂芝七明芝九光芝
石芝有石蜜芝石桂芝石硫黃芝木芝有威喜芝飛
節芝樊桃芝參成芝木渠芝建木芝木華芝黃蘗擅
桓芝草芝有獨搖芝無風自動牛角芝龍僊芝麻母芝白
符芝隱晨芝朱草芝五德芝龍銜芝肉芝則萬歲蟾
蜍千歲蝙蝠千歲靈龜以生獸千歲鷲之類菌芝狀
如宮室或車馬或龍虎或人形或飛鳥五色無常已
上五芝服之皆令人長生茅君句曲山有五種龍僊

參成燕胎夜光玉芝霍山有五香芝良常山有螢火
芝神山有黃龍芝此外有人芝月芝山芝大芝鳳腦
芝金蘭芝隱晨芝紫矢芝朱草芝赤雲芝月精芝黑
芝金芝萬年芝夜光芝白雲芝雲母芝華芝鬼芝然
則大觀政和間王欽若丁謂蔡京輩所進皆鬼目之
類耳

禽經云風翔則風雨舞則雨霜飛則霜露翫則露風
鳶類霜鷗鷯也露鶴也雨則商羊皆禽名四名甚奇
又以肫識風以鼃識雨肫江豬也鵲知風螳知雨
五采之鳥有冠似鳳名曰狂鳥見山海經鵲鵲俗曰